

四庫全書

史部

欽定四庫全書

世宗憲皇帝上諭內閣卷十三

雍正元年十一月

上諭十七道

初六日兵部議奏叅遊等官丁憂給假定限十箇月  
奉

上諭所奏亦是但尚未詳盡今直隸人亦有在雲南居官  
者雲南人亦有在直隸居官者亦有近本省居官者一

例給假十月可乎其丁憂給假之處亦不得預定且無論何人聞訃莫不急遽一定假期必致將任內事件不交代清楚草率離任武職防禦甚屬緊要從前武職俱著在任守制必有深意嗣後給假部內應酌量其遠近定限其丁憂之員所防守地方有無緊要與應否給假之處著該督撫提鎮聲明具奏有應給假者朕方准行不可預定此本著發回再加詳議具奏

又兵部尚書盧詢條奏請定捕盜官役勸懲及窩主

之罪九卿詹事科道議奏請立捕役賞格窩主發遣  
黑龍江奉

上諭此議尚未詳盡從來盜案內盜首脫逃尚未緝獲或  
報以病故者甚多如何使盜首必不漏網並盜案亦不  
致稽遲之處應再加詳議再所擬窩主之罪尤未允協  
其窩主有窩強者有窩竊者有知情者有不知情者有  
分贓者有不曾分贓者律內按罪分別立決監候斬絞  
以至杖笞開載甚明今一概議為發遣黑龍江地方可

乎又所議獲盜過半免其治罪於過半之外孥獲一名賞銀十兩等語夫獲盜過半免其治罪足矣於過半數外孥獲一二名亦何賞之有即賞亦不過地方官酌量行之以示鼓舞又何得預定所賞之數著落地方官令其捐出乎此本著發回再行詳議具奏

初八日大學士馬齊等奏京口將軍印務已經奉

旨著李扶署理悞將張天植自陳本擬票簡用副都統署理京口將軍印務字樣請將臣等交部議處奉

上諭忠君愛國之心發於至誠凡事自然不致舛錯遺漏  
惟思竊位沽名趨利避害僥倖於萬一而於國家制度  
政事輕重絕不加意茫然不知豈不貽笑於世國家政  
事皆

皇考所遺朕年尚壯爾等大學士所應為之事尚可勉力代  
理爾等安樂怡養心力無耗得以延年益壽是亦朕之  
惠也此等小事猶非所重但能各守君臣大義使朕不  
致恐懼疑惑便是國家之福朕之所望於大臣者於一

切利欲之心勉自克制精白乃心維持國家大體不使  
吾朝君臣貽譏於萬世朕之所望足矣若欲以機心行  
機事思以惡名歸之於朕朕斷不能受爾等徒用心於  
無用之地耳君臣一體尚其思之

初九日

諭大學士等古制凡廟諱文書式但於本字內缺一筆不  
改易字樣朕於

聖祖仁皇帝聖諱二字每見即感痛於心昨偶閱時憲歷二

月月令內見

聖諱上一字不覺失聲長慟嗣後在京各部院衙門及八旗  
在外各省將軍副都統督撫提鎮司道府州縣衛凡奏  
章文移遇

聖諱上一字則寫元字遇

聖諱下一字則寫燭字爾等交與該部即遵諭行

十一日

諭戶部浙省偶值秋旱其被災地方已降諭旨蠲免錢糧



令有司加意撫綏查杭嘉湖所屬被災十四州縣應額徵漕米三十二萬石朕思荒歉之歲民間納米為難著令徵收一半改折一半俾地方多存正米十六萬石又有耗米若干既可以濟民之食又可以紓民之力於閭閻大有裨益其改折之價著照康熙九年例每米一石折銀一兩按限解部又念被災之後所交米色未能純一其十六萬石漕米著令紅白兼收以示朕軫恤地方格外施仁之至意爾部即遵諭行

二十一日奉

上諭為治之道在於務實不尚虛名朕繼承丕基時刻以吏治兵民為念事無大小周思詳慮求其見諸施行實可以有濟天下者必下諭旨諄諄告戒中外條奏有當理者無不嘉與採納所冀內外臣工實在遵行庶有成效一年以來所降諭旨及內外條奏頒發於六部九卿八旗直隸各省者亦已多矣內外衙門於奉到事件若不過行一文書出一告示徒托空文竟不見諸實事則

不徵不信豈朕倚毗相助為理之至意歟倘所降諭旨及條奏准行之事其中果有一二未盡允協宜加損益者自當據實入告著通行曉諭六部九卿八旗及各省督撫提鎮凡從前所降諭旨及條奏議行事件皆令於來年十二月將各條各款實在如何施行及行之如何已有成效條分縷晰明白奏聞至有密奏密降諭旨者仍詳悉密封奏聞朕之所以寬其限者欲俾各得悉心體究斟酌施行於吏治兵民實有所濟各宜砥礪以副

朕懷

又

諭禮部

孔子道冠古今為萬世師表薄海內外無不俎豆尊崇國學乃四方表率其制尤重

聖祖仁皇帝臨雍釋奠典禮優隆朕續承大統景仰先型羹牆如見念國學為造士之地聖教所被莫先於此恐歷歲既久有應加修葺之處爾部會同工部詳加閱視凡

文廟殿宇廊廡及講堂學舍務須整理周備俾廟貌聿新  
以申景慕朕將親詣焉

又刑部等衙門以盜犯陳謀等分擬斬決發遣具奏  
奉

上諭曰

皇考如天好生凡大盜事件按律俱應立決者並交與大學  
士會同三法司議將造意為首及傷殺人者一二人正  
法餘俱減等發落今此案大盜陳謀等聚黨連劫七家

殺傷人命情甚可惡著大學士會同原議大臣將同行連劫七家及情屬可惡者再行逐一詳察議奏

二十二日奉

上諭庶吉士散館滿漢試卷著隆科多張廷玉張伯行登德閱看具奏從前已將庶吉士內揀選分用此內或更有才堪外任及可任部員者爾等會同朱軾分別具奏朕思編檢庶常乃清要之選必須學問優長人品端方始為稱職若品行有虧雖文藝可觀亦無足取爾等再

問塞楞額鄂爾奇文岱王國棟伊等如知其學問優劣  
人品賢否之處亦據伊等所知具奏至今歲所中進士  
爾等務悉心察訪必得文行兼優之士擢為庶吉士將  
來始可以收得人之效其餘散進士聽各修書館總裁  
等有知其學問有用者即著伊等指名題取効用雍正  
元年特開恩科所拔狀元于振等應格外施恩將于振  
即授翰林院修撰戴瀚楊炳俱即授翰林院編修二甲  
第一名張廷珩即授翰林院檢討俱著在南書房行走

二十五日

諭宗人府大學士領侍衛內大臣九卿等怡親王於

皇考時敬謹持身廉潔立品未嘗圖利干預一事糾黨邀結  
一人所屬人員略無擾累不似其他無知弟輩種種致  
煩

皇考聖心其安分自守家計空乏舉國皆知朕素崇獎自朕  
御極以來一心戴朕克盡臣弟之道所交事務悉効公  
忠亦衆所共知也查從前朕弟兄分封之例總計各得



錢糧二十三萬兩朕欲援此例賜之王以十萬儘足奏辭不已朕勉諭再四王僅受十三萬兩而已再照裕親王例令支官物六年王又摺奏朕不准所請王叩首固辭極其懇切較之弟輩中數人罔知自愛在

皇考時不知恩不知足百計盜取國帑者當作何分別也朕欲以王之善表揚於衆以愧無知諸弟且為後日子孫模範故特諭諸王大臣今不允王之所請既不可得允王所請則超軼尋常實心為國宣力之弟轉不得以諸

弟兄應得之分賜之朕心實為不忍殊難裁奪著諸王大臣議奏

又禮部奏冬至令節於

皇后前進箋行禮儀注奉

上諭朕舉行冬至慶賀禮因

聖祖配

天大典諸王大臣強之再三朕不得已從之皇后前上箋慶賀之禮過三年舉行

二十七日奉

上諭殿試武進士著兵部酌定考期具奏考試之日清晨寒冷著於辰時預備朕於巳時臨試著茶房膳房預備考試人員食物如是日大風甚寒兵部具奏改期此次考試乃朕元年加科恩例伊等自外省來者甚多適遇冬寒著每人賞銀四兩為整理衣服賃取馬匹之用又兵部以考選軍政具奏奉

上諭此係初次考選爾等秉公考驗此官員內有出兵効

力行走年老俸深者諸事尚能坐理仍著留任如果不堪方行革退再人雖年老衰頹不宜留任而出兵効力之處甚多將伊即行革退致令無以度日深屬可憫似此等者另行分晰具奏朕自加恩其雖無効力行間之處而供職年久者伊等身逢太平之世何由得經歷戰陣爾等亦宜留心朕若不下此旨爾等不敢如此驗看

二十九日

諭大學士等向來庶吉士學習清書散館之後每至荒廢

以三年學習之功置之無用殊為可惜嗣後清書散館之翰林不可令其荒廢今年新科進士選拔庶常朕意學習清書者少派數人令其盡心學習務期通曉散館後亦不可荒廢或在翰林或在部曹即令與滿員一同繙譯如此方實有裨益新科進士於引見之前朕欲先行考試知其學問再行引見選拔庶人才不致遺漏目今天時寒冷考試之日一應仍照殿試預備考試題目朕將詩文四六各體出題視其所能或一篇或二三篇

或各體俱作悉聽其便

又

諭八旗大臣副都統初爾薩條奏內稱欲裨益於兵丁生計故於喜喪之事俱加恩賜臣愚以為從前滿洲人等遇有喪事親友饋送粥茶弔慰後因風俗漸弛至有多備猪羊大設餽饌送飯者官兵競相倣法不計產業過事奢靡等語夫饋粥一事乃我朝滿洲人篤於居喪至廢飲食是以親友相恤特饋粥以食之並非筵宴也但

此禮沿行至今失其本意竟至過為侈費昔廉親王允禩值伊母妃之事欲沽取孝名詭為孝行迨至百日猶令二人扶掖匍匐而行於定例外加行祭禮每祭焚化珍珠金銀器皿等物蕩盡產業求異於人其令人扶掖而行至半年者係何意見何以此迄今思之終不可解朕於是時曾恐允禩致殞其生特加憐惜及事畢畧無衰損愈覺充肥由此觀之其專事狡詐明矣彼時曉事之人多有厭憎而譏議之者敦郡王允祹郡王允

禋貝子允禔三人相結指稱送飯大設席面百日之內  
輪流饋送日用猪羊二三十口備極餽品四人門下人  
等每日筵宴紛擾不但朕知衆人無不知之也且允禔  
等曾以與允禩送飯會同朕躬以允禩如此詭詐沽名  
而無知之人遂謂允禩為甚孝以致舉國喧傳此亦衆  
人所共知也惟我

皇考洞見其情曾於衆阿哥會集時

諭曰孝必本於誠心如欲邀孝名即為虛偽即為不孝為人



子者不務盡孝於父母生前而欲矯飾於歿後譬有乞丐於此告之曰爾死我為爾焚化金銀累萬彼乞丐亦只欲生耳斷無羨死之心也以之指責允禩者屢矣朕當

皇考

皇妣大事惟遵

皇考當

皇祖考

皇祖妣大事時所行儀禮外不敢借稱盡孝稍有詐取名譽

過為矯飾之處論語云禮與其奢也寧儉喪與其易也寧戚朕前曾降諭旨著大臣等查考喪禮定為儀節具奏已經十月尚未議覆今朕欲協諸經書義理期有裨於旗人生計將副都統祁爾薩所奏准行但恐衆人謂朕抑制伊等使居喪不得備禮有礙於子孫盡孝之心親友相關之誼如以有礙不准祁爾薩所奏又恐不協經書義理無裨於旗人生計是以朕尚疑而未定著各部及八旗大臣等會同詳議具奏至從前所交議奏之

旨經至多日大臣等尚未議奏必有不便施行之處大臣等不敢直陳朕恐悞降諭旨心甚疑焉如果有不可行之處將旨繳回大臣等遵

旨議定條例具奏奉

上諭凡作偽飾詐以取虛名係朕平日所羞為者且自

太祖

太宗

世祖

聖祖以來歷代相繼專務誠實撫天下之萬民登國家於平治毫無粉飾之政諸臣咸當恪遵我朝制度崇尚實行鄙薄虛名此所奏知道了將兩次所降諭旨一併傳示八旗徧令遵行

又奉

上諭前將怡親王奏摺交王大臣等議奏王又屢次奏辭力求允其所請朕尚難於酌定想王大臣等自難定議今除喂養馬匹外俱著照所請以副王謙抑之懷朕另

行加恩將現在王所兼管之佐領俱令為王之屬下賞給頭等護衛四員二等護衛四員三等護衛十二員共添護衛二十員加賜豹尾槍二長桿刀二每佐領下添給親軍二名王大臣等若謂理宜如此施恩於王即遵旨行知各該處

世宗憲皇帝上諭內閣卷十三

欽定四庫全書

世宗憲皇帝上諭內閣卷十四

雍正元年十二月

上諭十一道

初五日

諭內務府總管等凡為莊頭之人以力田節儉為本如李  
姓鄔索住等奢侈妄為俱已獲罪莊頭等當深以為戒  
勤農務本躬行節儉教訓子孫讀書守分如果有才能

朕自加恩錄用爾等傳諭知悉再莊頭等所居房舍應量其家口所需酌定額數無得恣意僭侈如有仍前諸弊不知服田力穡但以奢靡相尚擅用非分之物作種種兇惡之事及違例廣建房舍者定行正法

初六日

諭八旗都統向者每申喇止叅領一員因不敷用始委署一員協理昨議政大臣奏稱護軍校驍騎校等官以之委署叅領職卑不勝其任停其委署等語其說亦是今

將委署叅領即改作副叅領秩為五品嗣後副叅領員缺仍將護軍校驍騎校等官一併揀選引見補用若叅領副叅領奉有差遣其員缺應行委署者奏聞委署如此則責任專而管轄得力由兵丁出身者其陞轉之途亦不致壅滯旗下既得人材事務亦大有裨益員額既添効力之人益得上進至現在委署叅領應分別優劣優者授為副叅領劣者奏明令其各回原任

初七日吏部戶部議覆貴州省奏銷康熙六十一年



地丁錢糧經徵全完各官照例議叙奉

上諭貴州通省地丁錢糧不足十萬兩若照此議行僅有  
經徵各官得邀議叙督催各官雖極為効力終不能得  
議叙其督催各官或仍照十萬兩以下一年內全完准  
行議叙之定例或合併二三年錢糧督催全完始行議  
叙之處戶部會同吏部定例議奏

初九日刑部等衙門奏臺灣叛寇餘黨劉國華等出  
洋行劫分別治罪其被盜殺傷之兵丁林光等分別

卹賞奉

上諭此本所議賞兵之處甚輕一兵陣亡五兵得傷亦曾  
殺死二賊伊等攻戰是實應照軍功議叙至收受賊首  
劉國環杜君英所給劄付仍舊整年藏於吳郡山中同  
夥俱係叛逆該督定擬斬罪部內議減非是宜將原先  
不入叛黨後方入夥行劫賊犯另為查明分別定擬

十一日兵部議奏副將胡友良年老休致奉

上諭副將胡友良曾否立有勞績著查奏再從前軍政時

有副將以下官員因病殘疾不能騎射革退者伊等少年時在軍前曾著勞績今因年老不能騎射以致革退情屬可憫著交與兵部將曾在軍前効力身帶傷痕竭力供職之員逐一查明具奏

十五日

諭九卿朕惟靖盜所以安民而欲靖盜必須嚴諱盜之處分併正竊盜之刑法州縣有司因畏盜案叅處顧惜功名往往諱盜不報或以強為竊或以多為少或賄囑事

主通同隱匿以致盜賊肆無忌憚定例諱盜處分不為  
不嚴無如督撫等官全無覺察殊負朕保愛良民之至  
意再竊賊雖非強劫然行竊日久必至夥劫所以律載  
竊盜三犯即絞立法之意原在防微杜漸今各直省竊  
盜依律究擬者絕少盜案之多實由於此如何使有司  
不敢諱盜併如何重懲竊盜之處該部會同詳議具奏  
又刑部等衙門議覆河南巡撫石文焯題奏毆死小  
功服叔之馬洪望擬斬立決一案奉

上諭從前湖廣巡撫張連登所題楊商王與楊眉望之父楊末公角口楊眉望見伊父被毆將大功服兄楊商王毆死因此援引救父殺死大功服兄之譚華常改為免死減等充發之例將楊眉望題請減等朕以

皇考在日將此事交與九卿會議減等結案者亦因諒其情由可矜施法外之仁然並不曾著為定例張連登何得即引此為例將楊眉望減等具題故將張連登交與吏部議處今石文焯疏稱馬兆六與馬洪望之父馬兆謙

角口馬洪望因救父將小功服叔馬兆六打死援引救  
父打死小功服兄之吳育改為擬斬監候之例將馬洪  
望應否減等之處聽候部議題請與理頗合部內雖議  
將所請之處不准仍將馬洪望照例擬斬立決朕念馬  
洪望因救伊父將馬兆六打死馬洪望改擬監斬候張  
連登石文焯所題事件情由雖同石文焯援例兩請張  
連登乃擅自減等具題恐各省督撫不知其故以其為  
事相同何以獨將張連登議處且恐其畏罪將此等事

不敢具奏嗣後命案有似此情由可矜者仍援例兩請  
朕閱覽定奪再或有子之人與人角口故令伊子將人  
毆死者豈可減等此風斷不可長將此諭旨通行直省  
總督巡撫

十六日奉

上諭諸路軍前兵丁自軍興以來並皆竭誠効力前朕特  
降諭旨屢次將老病者撤回寧家現在軍前之人盡屬  
壯健奉命勤力無一違悞之事甚屬可嘉時值冬寒俱

著賞給行糧一月

十七日浙閩總督滿保奏請嚴禁天主教禮部議奏  
各省西洋人除應送京効力者外餘俱安插澳門奉  
上諭西洋人乃外國之人各省居住年久今該督奏請搬  
移恐地方之人妄行擾累著行文各省督府伊等搬移  
時或給與半年或數月之限令其搬移其來京與安插  
澳門者委官沿途照看送到毋使勞苦

十九日



諭兵部國家保障封疆惟武臣是賴叅將以上責任尤重其年老有疾不能料理以致營務廢弛者自難姑容但其間或有久歷戎行曾著勞績者情亦可憫嗣後叅將以上有老病之員該督撫提鎮照例題叅仍將伊從前行間効力之處查明另繕奏摺夾於本內同送內閣奏聞朕酌加恩典以示篤念舊勞之意

又奉

上諭定例八旗官員等一經革職盡謂之廢官令當勞苦

差役挑取烏鎗馬甲夫革職之人今雖罷黜其未革職之前亦曾仰受國恩榮列班聯若果以頑劣無恥致獲罪戾此係伊所自取固宜列於廢官令當勞苦差役至因公誥誤衰老有疾才力不及無心等過獲罪人員並非故犯亦列廢官令當勞苦差役情甚可憫嗣後八旗革職人等各視其罪之輕重著為定例如婪贓枉法虧欠帑項規避怠惰行止不端曠班等罪革職之人仍照舊例令當勞苦差役此外因公誥誤衰老有疾才力不及無

心等過革職之人將吏於廢官挑取烏鎗馬甲及當勞苦差役之處概行寬免如此不但現任官員惟恐後日之為廢官敬謹不敢輒犯即因公註誤革職人等雖經削職尚得改過自新安知其日後不仍堪効用也著交該部議奏

世宗憲皇帝上諭內閣卷十四

欽定四庫全書

世宗憲皇帝上諭內閣卷十五

雍正二年正月

上諭十三道

初二日奉

上諭朕詢問貝勒博貝爾管轄之烏梁海人民何以為生  
據奏臣在將軍奇立德處借餉一萬八千五百六十兩  
辦買牲餼均勻分給各得產業今勝於昔其所借餉銀

將臣奉銀逐年抵補還項等語博貝爾歷年宣力勲績卓然且烏梁海等衆亦係朕之羣黎百姓豈有養育朕之羣黎百姓而借餉於朕之理所借銀兩不必扣還著行文將軍奇立德知悉

初八日軍前効力宗室賴士叅奏駐防都統圖臘副都統鄂三與羣小怨望誹謗

聖躬捏造拘拏諸大臣凌逼衆阿哥縱恣隆科多年羹堯擅權等語具奏奉

上諭朕覽爾此奏不覺大笑爾乃不知朕居心行事之人  
若朕身有過愆我

聖祖皇考誤將此位付託於朕若輩雖不如此譏評而朕返  
躬自問亦覺赧然若朕之品行尚堪承荷大業能不負  
我

皇考付託之重有裨益於國家黎民無論無此荒唐謬妄之  
語即使有之其議論之人

天必鑒之徒自作孽耳於朕何與況此等瑣屑懷私之事朕

實不為若朕果以恩怨繫心肯為挾私報復之人我

皇考至聖至神亦必不將大位傳與朕躬也且朕從來并無汲汲以居心行事表白於衆之念亦並不以此置之懷抱不但爾不能知朕舉世亦無知朕之人今此一年內中外之人亦略知大概矣爾遠在軍前是以尚未悉知若再稍有所聞自能豁然醒悟矣爾豁然醒悟時爾自覽今日之所奏亦必發笑也爾亦不必愧怍畏懼但當安心黽効力贖罪不必營營枉勞心慮也親筆書此

特行曉諭爾身為宗室故如此剴切陳奏朕心嘉悅爾但寬心勿為朕慮朕必不至大誤極謬可以自保 又奉

上諭將賴士此奏令兩營大臣官員俱行觀覽并朕硃批諭旨亦令觀之使衆各一笑

初九日

諭理藩院世間尊重喇嘛者特因其為佛門弟子耳宗風漸泯喇嘛猖狂犯法不守本戒今乃至於舉兵犯法抗



敵官軍肆行克逆實為大悖佛教誠如佛言壞我法門  
即我後來徒衆也西海逆賊羅卜藏丹津一事喇嘛等  
理宜將作亂之人善言開導令其和輯不致起事戕害  
生命是為維持佛教如其不能亦應呈明該將軍等各  
自閉戶安居豈意反助西海悖逆之人竟糾合數千喇  
嘛手持兵刃公然抗拒官兵及至潰敗猶不降順入廟  
固守以致追殺覆滅有玷佛教至矣極矣欽惟

太宗文皇帝時第五輩達賴喇嘛遣使入覲極為公順及

世祖章皇帝時將第五輩達賴喇嘛延至京師封為瓦齊拉達喇達賴喇嘛蒙被殊體百年以來法教得以興隆者皆我朝之恩也前者準噶爾寇取照地殺戮僧徒拆毀寺廟

聖祖仁皇帝遣發大兵恢復昭地俾達賴喇嘛重安法座佛教復興如此隆恩喇嘛並不感激反黨助悖逆之人克惡已極朕素閱內典優待喇嘛不但喇嘛等無不盡知即衆蒙古王台吉等想亦共聞諸蒙古等祇知尊崇佛

教不分涇渭但服袈裟之人即便禮拜以致喇嘛等毫  
無忌憚任意妄為敗壞佛門無所不至現今吳喇忒公  
達爾馬悉利奪人婦女給伊供奉之喇嘛溫克格隆被  
人告發如此尚得為尊崇佛教者乎因此等不堪之喇  
嘛不但索累大臣高僧抑且毀辱世尊法教敬佛重僧  
豈應如此朕於喇嘛中有高行者敬重之其庸劣者切  
責令其悛改務使僧衆勤修戒律各遵經典依波諦母  
爾義信受奉行俾佛日永輝法流彌遠始為無愧佛教

耳喇嘛皆係蒙古雖知誦經至於三藏大義本性圓通未必如朕尚有精通經典別有所見謂喇嘛之善惡不必分別理合一概恭敬聽其任意妄行乃有益於佛教者可令伊與朕面相辨論伊說果長朕即准行如伊之所見不能高出與朕自應與朕一心令喇嘛等精進修行以圖永遠興隆佛教矣佛經云欲聽人為子弟者必令從師三年觀師所為然後禮拜為師為師者亦必三年內知其果可以為弟子然後傳經不然苟且拜為師

弟以致毀滅戒律其罪更甚於十大惡據此則供奉敗  
檢踰閑之喇嘛者其受破戒之罪業必矣於佛教有何  
益乎將朕此旨遍諭各處寺廟喇嘛並住居蒙古扎薩  
克處之大小喇嘛等知之嗣後人人謹持經典清淨六  
根各守本願誓戒屏絕嗜慾將宗喀巴所說之波諦母  
爾經竭力遵行不知者從德行兼全之喇嘛傳其傳授  
為決趨向遵依菩薩經典讀誦受持於六波羅密功夫  
一心力行使念念常歸平等方能合於佛教再佛說十

大惡罪常人亦毫不可犯惟應積福德行況喇嘛者乃  
佛弟子何可不遵佛說不積福德行而犯十大惡罪乎  
尚其竭力勉遵毋忽倘陽奉陰違不守本願誓戒毀滅  
法乘妄作惡業甚至飲酒賭博經營買賣爭戰鬪毆興  
搆詞訟種種肆無忌憚是於佛法國法俱為有罪罪之  
大者必照律定擬其未至于犯國法之處照京城喇嘛  
清規分別輕重定為三等至輕者於衆喇嘛齊集念經  
之所令其虔禮百拜畢再令供掃地之役中等者令其

齊僧布施禮拜懺悔重者杖責驅逐出廟還俗為民倘該管大喇嘛得木齊格斯奎等不嚴行約束教訓怠玩瞻徇以致生事一經告發將該札薩克並該管大喇嘛得木齊格斯奎等從重治罪如此伊等自必一心勉力將衆人漸漸化誨俱各遵奉經典依波諦母爾義信受奉行是為維持佛法於宗喀巴之教大有裨益

十八日奉

上諭楊琳辦理鹽務以來錢糧雖然完納聞將窮民生理

盡行霸佔百姓怨憤夫錢糧雖屬緊要當為百姓存留  
微利養生若既為錢糧起見又圖自己取利絲毫不與  
百姓使窮民失所成羣竊盜其害較缺欠錢糧為大務  
須謹慎廉潔從公辦理方屬稱職不可只為錢糧起見  
不顧百姓

又

諭宗人府前者

皇考以公星尼無恥不端招搖生事革去公爵繼又念伊先



人之故仍復施恩令伊子星海承襲公爵詎知星海又復不才昏庸懶惰身罹國憲

皇考尚冀星尼或知懲創悛改惡習復其公爵以觀後效今星尼不惟不感戴

皇考之恩不知改行易轍且各處鑽營無恥莫甚有玷天潢著仍革去公爵拘禁在家毋令疎縱將應襲公爵之人查明具奏再伊屬下佐領甚多與公爵不稱可酌留數佐領與襲公之人其餘佐領存於公處著該旗議奏星

尼待伊佐領下人貪汙不法不加懲治將來宗室必至  
無所顧忌矣

又

發下八旗都統年底所奏閱射優劣及奏銷錢糧紙張  
等項各摺奉

上諭覽八旗都統所奏甚屬糊塗理應陸續乘便各將一  
二事具奏朕得次第披覽明悉方可辦理今將一年所  
積事件於年底彙奏盈千累百之摺朕一時從何處看

起朕若不披覽明悉如何辦理嗣後射箭人員不到或技藝生疎者作何勒限教訓其逾限不到或不遵教訓者作何治罪著公同酌議具奏其應裁減之項奏請裁減再或應陸續分奏以便朕覽或應公摺彙奏以便交部查核之處俱著詳議具奏

十九日奉

上諭嗣後本章奏摺內字面及人名有與朕名字同者應迴避更改外其餘與朕名音同字異及同邊傍之字俱

不必迴避更改

又

諭總理事務王大臣朕御極以來加恩文武官員各得陞階而宗室獨無仕進之路朕欲施恩予以陞階思之再三總不可得如用伊等為大臣侍衛猶可供朕使令若用之部院或遇伊等屬下人為大臣難以行走勢必至於不得不瞻徇情面若令其應鄉會試與民人一體搜檢亦失觀瞻可否補用宗人府官員筆帖式之處爾等

傳與宗人府確議具奏再宗室內有學優才美者作何  
考選之處亦著確議具奏

二十二日都察院奏吏科戶科掌印給事中揀選補  
授奉

上諭巴圖白濟俱依擬用但奏稱吏科戶科甚屬緊要嗣  
後掌印給事中缺出俱揀選具奏若以吏科為緊要則  
兵科稽察補授武官寧不緊要乎若以戶科為緊要則  
刑科稽察人命寧不緊要乎所議非是將本發回著改

正具奏

二十六日奉

上諭八旗滿洲蒙古漢軍俱係累世効力舊人承平既久  
滿洲戶口滋盛餘丁繁多或有人丁多之佐領因護軍  
馬甲皆有定額其不得披甲之間散滿洲以無錢糧至  
有窘迫不能養其妻子者朕每思及此惻然動念將如  
何施恩俾得生計之處再四籌度並無長策欲增編佐  
領恐正項米石不敷朕若不給與錢糧俾為養贍何以

聊生計不能養其家口何由造就以成其材今將旗下滿洲蒙古漢軍內共挑四千八百人為教養兵訓練藝業所挑人等只給三兩錢糧計四千八百人一年共需錢糧十七萬二千八百兩每一旗滿洲蒙古漢軍共六百名內蒙古旗下六十名漢軍旗下八十名其漢軍之八十名令為步兵食二兩錢糧就此錢糧數內通融料理可以多得四十名兵丁每一旗著挑取一百二十名再看來軍器內長槍尤為有用著滿洲蒙古每佐領下

挑取護軍四名馬甲四名令其學習長槍漢軍每佐領  
下挑取馬甲四名令其學習藤牌挑刀此四千八百名  
教養兵若計佐領挑取恐其人多寡不同應於旗下  
甲喇內計其人數挑取如此則護軍馬甲益得有用之  
人而閒散餘丁亦得習學成就矣至於如何編錄教訓  
管轄之處八旗都統護軍統領副都統等公同盡心詳  
究務期永遠可行定議具奏

二十七日



諭將軍傅爾丹奇立德等策妄阿喇布坦事已七八年矣  
此數年內動支正項糧餉採買馬駝羊隻及轉運軍儲  
留在軍前之橐駝喀爾喀所捐上都鹽池所解八姓商  
人所買各項馬駝羊隻共計數目若干此數年內用過  
若干現存若干將此馬駝羊隻曾交何旗看守看守之  
札薩克處現存若干缺額之處已賠者何人未賠者何  
人將始末根由確實詳查物數人名一一開明具奏凡  
事必須確實斷不可私意徇情巧為隱飾軍需關係緊

要朕必知之甚明然後處之允當也

二十九日戶部議覆山東巡撫黃炳所奏康熙六十年并雍正元年散賑銀米著落各官賠補奉

上諭地方偶有災祲朕即軫念窮黎遣官散賑動支正項銀米務使均沾實惠此拯救災黎之至意也如將散賑銀米不入正項開銷著落各官賠補殊非朕特遣官員拯救災黎之本意巡撫黃炳所奏康熙六十年散賑用過穀石及雍正元年散賑用過銀兩二疏俱交與該部

將散賑用過銀米准入正項報銷再李樹德居官貪婪  
伊任內經管倉穀久已虧缺欲借散賑以補虧空乃天  
下之所共知也此等人斷難容其倖免所有借賑冒銷  
之倉穀散賑用過之庫銀著在李樹德等名下另行勒  
限嚴追至伊同時貪官陶錦李元龍等應賠之人李樹  
德知之甚悉即令李樹德分晰明白盡行著落賠補庶貪  
官知所儆畏而地方公事亦有裨益

世宗憲皇帝上諭內閣卷十五

欽定四庫全書

世宗憲皇帝上諭內閣卷十六

雍正二年二月

上諭十三道

初二日

諭都察院元年恩科典試諸臣皆體朕意矢公矢慎應試士子亦皆恪遵功令未敢苟且鑽營是以場前場後俱各帖然今聞應試士子不比去年安靜竟有投送詩文

干謁往來親密者現今開列之同考官若少為其所搖動乃自取罪戾也朕之賞罰悉秉至公今場前既多奔競榜後必生事今歲同考官當十分謹慎毋蹈法網都察院即頒示曉諭應試士子皆令安分守法毋得希圖僥倖仍實心察訪如有鑽營彰著者即行拏叅治以重罪

初五日

諭諸王大臣九卿等欽惟

孝莊文皇后躬備聖德

天錫純喜誕育

世祖章皇帝瑞應昌期君臨萬國逮我

聖祖仁皇帝繼

聖嗣統久道化成立萬世無疆之業皆我

孝莊文皇后福德兼隆之所啟佑也康熙二十六年十二月

慈馭升遐先期

面諭我

聖祖仁皇帝曰我身後之事特以囑汝

太宗文皇帝梓宮安奉已久卑不動尊此時未便合葬若另  
起塋域未免勞民動衆究非合葬之意我心戀汝父子不  
忍遠去務必於遵化安厝我心無憾矣再四丁寧言之懇  
切我

聖祖仁皇帝涕泣受

命爰

諭王大臣集議僉同於康熙二十七年四月安奉

梓宮於

孝陵之南

暫安奉殿迄今三十餘年矣朕惟禮經曰合葬非古也先儒  
又云神靈有知無所不通是知合與不合惟義所在今  
昭陵安奉日久若於左近另起

山陵究非合葬之義且自

孝莊文皇后安奉以來我

聖祖仁皇帝歷數綿長海宇乂安子孫蕃衍想



孝莊文皇后在天之靈極為安妥

遺命諄諄

聖祖仁皇帝遵奉三十餘年今朕任付託之重

山陵典禮理宜斟酌盡善以垂萬世者莫大於此著諸王大臣九卿等會同確議具奏

初九日

諭直省督撫等官朕惟撫養元元之道足用為先朕自臨御以來無刻不厘念民依重農務本業已三令五申矣

但我國家休養生息數十年來戶口日繁而土地止有此數非率天下農民竭力耕耘兼收倍獲欲家室盈寧必不可得周官所載巡稼之官不一而足又有保介田畯日在田間皆為課農設也今課農雖無專官然自督撫以下孰不兼此任也其各督率有司悉心相勸並不時諮訪疾苦有絲毫妨於農事者必為除去仍於每鄉中擇一二老農之勤勞作苦者優其獎賞以示鼓勵如此則農民知勸而惰者可化為勤矣再舍旁田畔以及

荒山不可耕種之處度量土宜種植樹木桑柘可以飼蠶棗栗可以佐食柏桐可以資用即榛楛雜木亦足以供炊爨其令有司督率指畫課令種植仍嚴禁非時之斧斤牛羊之踐踏奸徒之盜竊亦為民利不小至孳養牲畜如北方之羊南方之羴牧養如法乳字以時於生計不無裨益總之小民至愚經營衣食非不迫切而於目前自然之利反多忽略所賴親民之官委曲周詳多方勸導庶使踴躍爭先人力無遺而地利始盡不惟民

生可厚風俗亦可還淳爾督撫等官各體朕惓惓愛民之意實心奉行倘視為具文苟且塗飾或反以擾民則尤其不可也

又福建巡撫黃國材奏一應細事無庸瀆奏但咨部彙題奉

上諭曰

聖祖仁皇帝御極六十餘年孜孜圖治

聖壽已至七旬猶日攬萬幾不倦於勤朕仰承鴻業自宜效

法前規朝朝夕惕事無鉅細親為裁斷豈當年富力強之時而可稍圖暇逸乎如果中外大臣仰體朕心抒忠為國辦理事務井井有條雖封章堆疊朕心樂於披覽不以為勞若不殫心竭力苟且塞責以致事務廢弛雖日無一章朕心豈得安乎今黃國材身為封疆大吏自應將地方利弊作何興革官員賢否作何勸懲之處盡心辦理何得以省簡奏章之事為愛君之意迎合君上況伊曾以年老氣衰具疏乞休止應養其精神料理伊

任內事務今迎合瀆奏用心于無益之地殊屬不合原  
本著發回

初十日護軍統領汝福派往德州山海關等處考察  
軍政事竣回京具奏奉

上諭看爾等所奏各處兵丁亦有五十名者其守邊口兵  
丁又有二十四名者似此並不成部伍矣將所有五十  
名兵丁之處添為百名其守邊口之二十四名兵丁酌  
量添設則遇有用時可成部伍且由京城閒散人內挑

為馬甲派往又於滿洲人等有益將此及都統巴拜所奏之處一併交總理事務王大臣與爾等會同議奏

十四日

諭直省督撫百姓完納錢糧當令糧民戶到官不許里長甲頭巧立名色希圖侵蝕聞有不肖生員監生本身原無多糧倚持一矜輒敢包攬同姓錢糧以為己糧秀才自稱儒戶監生自稱宦戶通都大邑固多而山僻小縣尤甚每當地丁漕米徵收之時劣生劣監遲延拖欠

不即輸納大干法紀該督撫立即嚴查曉諭糧戶除去  
儒戶宦戶名目如再有抗頑不肖生監即行重處毋得  
姑貸倘有瞻顧不力革此弊者或科道官叅劾或被旁  
人告發查出必治以重罪

十七日奉

上諭帝王臨雍大典所以尊師重道為教化之本朕覽史  
冊所載多稱幸學而近日奏章儀注相沿未改此臣下  
尊君之詞朕心有所未安今釋菜伊邇朕將親詣行禮



以後一應奏章記注稱幸非宜應改為詣字

二十日

諭戶部朕軫念民依時厯宵旰遇有旱澇災荒惟恐窮黎失所雍正元年因直隸山東河南山西二麥歉收特遣廷臣發粟賑濟錢糧照被災地方分數已經蠲免停徵嗣蒙

天庥雨暘時若四省秋成豐稔少慰朕懷但念四省頻歲荒歉較別省為甚今百姓元氣方復若將兩年舊欠併於

本年徵收民力不知爾部速行文各巡撫查明實在舊欠若干據實題報分作三年帶徵其已收在官者速飭起解毋令不肖有司借端蒙混致滋虧空

又

諭直省督撫朕惟四民以士為首農次之工商其下也漢有力田孝弟之科而市井子孫不得仕宦重農抑末之意庶為近古今士子讀書砥行學成用世國家榮之以爵祿而農民勤勞作苦手胼足胝以供租賦養父母育

妻子其敦龐淳樸之行豈惟工賈不逮亦非不肖士人之所能及雖寵榮非其所慕而獎賞要當有如其令州縣有司擇老農之勤勞儉樸身無過舉者歲舉一人給以八品頂帶榮身以示鼓勵

二十二日奉

上諭科爾沁達爾漢親王和碩額駙羅布藏滾布旗下協理台吉兀爾虎滿乃我

皇考深加眷注之人且科爾沁十部非他部落可比自我

太祖

太宗開創之日首先臣服世締姻親為我

孝莊文皇后戚屬今科爾沁衆台吉內惟兀爾虎滿年老近  
又在軍前著有勞績去歲軍前回來朕憐伊年老留駐  
京師著將伊晉封公爵

二十三日直隸巡撫李維鈞奏古北口提標兵丁倒  
斃馬匹請免賠補兵部覆奏應不准行奉

上諭陝西出征之宣化鎮標兵丁倒斃馬匹著從寬免其

賠補前已曾降諭旨矣古北口提標兵丁倒斃馬匹亦照該撫等所請免其賠補

二十八日

諭刑部今屆仲春雨澤愆期時有大風朕心深用兢惕念自臨御以來惟恐政事或有缺失時時省察不敢少有忽略今雖有令諸臣陳奏政事之名而衆人不過一翻頌揚之辭毫無裨益朕之並無私意可以質諸

天地實堪自信無少愧處熟思刑名為國家之要政上關

天和下係民命若刑獄未能清理即為天時亢旱之由所以  
朕於讞獄必加詳慎即懲治之人雖置之於法朕於其  
中從寬從輕之處惟

天地知之至於兇頑之徒情罪可惡衆人亦有知者亦有不  
能盡知者朕俱於法外從寬不可勝數朕未經明示衆  
人何由而知凡諭旨懲治人等皆從輕治罪朕深可自  
信並無寬抑一人但爾部所辦案件雖如朕親理然其  
中終有微間夫用法不得不嚴所謂火烈而民畏之爾

等執法之官固宜外示嚴明而中心須存仁恕凡案件到部數日可結者不得固執定限即當速行審結以免拖累牽連則輕罪之人不致久羈囹圄且案件早完一日則無辜者得早脫一日之苦若因限期未滿任意耽延雖所告得伸者亦必致其含怨即訊鞠罪人亦不可輕用重刑若云非夾訊不能定案此尤爾部之大謬錄囚之際當如懲治爾等之子姪嚴切之下務存矜憫之心但求平允不可過當要使獲罪之人亦仍感激所謂

如得其情則哀矜而勿喜朕在藩邸時奉

聖祖諭旨審事初見用刑遍體驚顫不覺淚下至數見之後  
遂覺少異於前爾等刑官時理刑獄切不可習為平常  
爾等若於刑名少有未當即大負朕任用之意且爾等  
亦當自念其子孫少有疎忽所關甚鉅若致事有錯悞  
豈容推諉蓋刑部非他曹可比尤不可以愚昧意想不  
到以致錯悞為詞嗣後諸事當同寅協恭速為辦理毋  
得恃才偏執毋得瞻徇推諉爾等皆朕簡任之臣務宜



仰體朕心欽恤民命

又原任山東巡撫黃炳會同漕運總督張大有將砍伐柳株之糧船水手夏廷樑等照盜園

陵樹木律擬以杖徒一案刑部奏偷盜官物律有正條應不准行奉

上諭此案夏廷樑等砍伐沿河柳株爾部以有正律題駁甚是黃炳張大有將砍伐沿河柳株比照盜園

陵樹木之律甚屬不合著交吏部議處



世宗憲皇帝上諭內閣卷十六

欽定四庫全書

世宗憲皇帝上諭內閣卷十七

雍正二年三月

上諭十五道

初一日

諭禮部等衙門及國學諸生治天下之要以崇師重道廣  
厲澤宮為先務朕親詣太學釋奠

先師禮畢進諸生於彝倫堂講經論學凡以明道術崇化

源非徒飾園橋之觀聽也維

孔子道高德厚萬世奉為師表其附享廟庭諸賢皆有羽翼聖經扶持名教之功然歷朝進退不一而賢儒代不乏人或有先罷而今宜復有舊缺而今宜增其從祀

崇聖祠諸賢周程朱蔡外孰應升堂附享者並先賢先儒之後孰當增置五經博士以昭崇報均關大典九卿翰林國子監詹事科道會同詳考定議以聞再邇年文教廣被由我

聖祖仁皇帝壽考作人六十年來山陬海澨莫不讀書稽古  
直省應試童子人多額少有垂老不獲一衿者其令督  
撫會同學臣查明實在人文最盛之州縣題請小學改  
為中學中學改為大學大學照府學額數取錄督撫等  
務宜秉公詳查不得徇私冒濫至鄉試解額

聖祖仁皇帝屢次增廣乙酉戊子等科復於額外加中五經  
三名至五十六年而罷以其久而滋弊也嗣後各學臣  
及祭酒司業於錄科時先加面試主考閱文果佳本監

加中四名直隸各省大小不一某省應加中幾名著分別詳議定數具奏如無佳文寧缺勿濫會試臨時請旨本監貢生監生本科鄉試中式著加增十八名朕臨雍講學雖率由舊章然必期於世道文教有益不蹈一切虛文諸生其各欽遵

又

諭國子監祭酒司業等官朕惟聖人之道昭揭日月彌綸天地萬世帝王下逮公卿士庶罔不仰遵成憲率由教

言我國家尊崇

至聖遠邁前代繼承大統古訓是學惟日孜孜茲雍正二年三月朔日親詣辟離祇謁

先師孔子行釋奠禮思以鼓勵羣英丕隆文治爾監臣宜嚴督諸生善為誘導爾諸生亦宜殫心肄業實踐躬行秉端方以立身敦忠孝以興誼勿營奔競勿事浮華文必貴於明經學務期平濟世俾品成詣進以副朕教育至意此爾多士之床亦惟爾監臣董率之功也慎勿怠



荒職業以貽爾羞諸師生其共勉之

初四日博士孔傳誌候襲博士孔繼溥等恭遇

皇上詣學大典來京陪祀聽講禮成謝

恩

召見於

乾清宮奉

上諭爾等皆是聖賢後裔與衆不同然身為聖賢後裔之  
身必心為聖賢後裔之心方不愧先聖先賢今因爾等

遠來朕特召見面諭願爾等慎修厥德以繼家聲勉之勉之

初五日

諭刑部朕於二月二十八日面諭爾部刑獄上關

天和當欽恤民命牽連之人毋得久羈監禁爾等遵朕諭旨釋放數百餘人於本月初三日即大沛甘霖遠近霑足可見天人之感捷如影響莫謂適逢其會事屬偶然嗣後益當恪遵朕旨諸事更加詳慎以副朕刑期無刑之

至意

又大學士等奏

皇上至誠至敬感協

天心甘雨應時隨禱立霈臣等謹合詞陳賀奉

上諭誠敬二字朕之所勉但恐未能耳朕誠能先天下之  
憂而憂諸卿必獲後天下之樂而樂也與卿等期共勉  
之

初六日奉

上諭賭博案內有將該旗大臣官員一併議處之例但步軍統領衙門設有捕役緝拏賭博人等而都統等並無捕役其該旗人或於僻處同人賭博伊等從何得知若因一人犯賭遂將該旗大臣官員一併議處似覺無辜此議處條例殊屬太重著交吏部兵部刑部會同八旗大臣等再行詳定會議具奏

又

諭吏部兵部朕命各省督撫提鎮將所知官員保題特為

要缺欲得賢員之故今見凡陞往別省者概不肯令赴陞任各欲留於本省越次保舉題留者甚多夫天下一體豈得各分爾我嗣後如係水師營緊要員缺仍許題請以陞銜留任倘所陞現係要缺而所留之缺並無緊要一概不許題留

初九日

諭吏部兵部三年一次舉行大計軍政此內有應革職者若俟部議具題奉旨之後方行解任其地方遠者為日

甚久劣員預知被革恐其恣肆妄為嗣後舉行大計軍政之時有應革者即令解任若具題之後或有免其革職者仍可再行補授

十二日署江寧巡撫何天培將疎脫旗犯之解役陸升等援赦具題請

旨奉

上諭何天培將疎脫逃犯吳大柱之解役援赦具題此逃犯係何方何旗人何故脫逃並未聲明著交與大學士

等行文何天培著聲明緣由若不灼見其罪之輕重則應否寬免之處如何可定覽各省督撫奏章內亦有聲明緣由者亦有似此含糊不明者大學士等行文各該督撫嗣後事有類此者務令聲明緣由

十八日

諭準噶爾台吉策妄阿拉布坦爾前者無故侵擾我哈密疆界罪在不赦

皇考聖意止令邊地防守雖各路發兵原無勦滅準噶爾之

意也其後澤卜尊丹巴胡土克圖為爾奏懇

皇考欲施恩寬宥所以遣使楚陽托音等諭爾前年爾所遣使垂納木喀布匡等至澤卜尊丹巴胡土克圖處轉至總督年羹堯軍前送至京師朕定爾平生功罪開示大義面諭遣回今爾深省前非歸誠請罪遣使根敦同楚陽托音前來奏辭恭順得遂

皇考初心朕意嘉悅爾奏稱惟祈休養生靈闡揚正教為第一要務等語爾台吉不過準噶爾一部落之主尚欲休



養生靈闡揚正教何況朕天下之主普天之下皆朕土  
率土之濱皆朕臣乎朕特為休養生靈闡揚正教之故  
遣御前總管京城喇嘛班第副查薩克大喇嘛達爾漢  
楚陽托音內閣學士衆佛保副都統扎錫喇嘛錫拉卜  
格春等宣諭若台吉果欲輯寧爾國尚其誠一乃心與  
朕所遣大臣等申定疆圻諸事順理妥議歸於和順朕  
必施恩軫念永遠眷顧仍前通市使命往來爾台吉誠  
能以鮮終為戒其必惟和惟順無貳無疑披瀝悃忱以

期永好不特克協於朕休養生靈至意爾台吉游牧地方亦永永無虞安居樂業矣特此諭示兼賜爾各色緞二十七疋

二十日奉

上諭王鼎馬咸厚係新科進士非應得即用之人因年已將老朕格外施恩越次選授但年老之人戒之在得務須仰體朕心益加勉勵勤慎供職方不負朕特用之意嗣後新科進士選授時即將此旨傳知

又

諭刑部刑獄關係重大必須虛公詳慎盡得實情不可疎忽遺漏以致民有冤抑君臣之義本同一體朕視臣下如手足爾等若遇事有可疑而不能決者不妨面奏待朕斟酌至當然後施行既不面奏又以私心揣度巧欲逢迎上意及刑罰不中則退有後言爾等身為股肱大臣而存此等卑污之心豈不可恥或朕有未當之處亦不妨直陳所見人非聖人孰能無過君子之過如日月

之食過而能改善莫大焉朕之不吝改過諒爾諸臣素所共知凡有功者加之以賞有罪者加之以刑此乃帝王馭世之大權朕但知因事順應並不先有成見嗣後爾等皆宜體朕欽恤之意不可自恃已見亦不可彼此推諉拖累罪人和衷協恭平心靜氣毋得有意逢迎務使用法如衡之平如鑑之明庶幾民不輕犯國無冤獄以共成咸中有慶之治

又刑部議奏護軍校五十向伊主逞強照例發遣奉

上諭此事部內審議俱屬錯謬刑部從前但以五十向伊  
幼主逞強請革去護軍校以便刑訊含糊具奏朕因准  
令審理今看所審之事並未詢問公門度門度知情與  
否亦未聲明又云五十刀砍七兒有嘴唇皮破傷痕刀  
砍如何只破嘴唇驗傷處亦不明白惟據準保等任意  
拏送便將五十刑訊揆斷擬罪五十係為伊父門度辦  
理家務効力年久之人念養之恩見幼主有過直言  
規諫以致懷恨送部亦未可定此事著交與宗人府大

學士公馬爾賽會同刑部問明公門度詳加審究務得實情具奏再諸王貝勒貝子公等屬下包衣人員俱係累世効力舊人或念伊先世豢養之恩見幼主有過直言規諫或因需索不遂并聽小人讒佞之言將効力之人妄加殘害借端送部治罪則忠直之輩人人箝口而讒佞小人反得任意橫行矣朕君臨天下不使一人負冤獲罪豈可聽下五旗公等任意肆行毒及無辜乎嗣後如此等曾在伊先世効力之人幼主無故尋釁妄行

陷辱借端送部治罪者准其聲明冤抑或赴宗人府或赴都察院呈訴該衙門奏聞詳審果係冤情或撥於別旗或撥於他王門下若所訴盡誣當如何加等治罪之處亦著定議具奏

二十三日奉

上諭正藍旗滿州蒙古漢軍三旗兵丁不能置備器械者滿州佐領八十一分內兵丁二百一十三名蒙古佐領三十分內兵丁九十六人漢軍佐領三十二分內兵丁

八十名共計三旗兵丁三百八十九名著照依正白旗滿洲例賞銀令其置備其餘他旗賞銀置備器械之處即照依正監旗所奏佐領下人多寡定其數目照數動內庫銀兩賞給此非計其佐領行賞都統等務應身自詳查視其實係不能置備之人賞給令其置備其鑲白旗滿洲兵丁等器械雖經世子弘昇奏稱所缺無多已將養馬銀兩那移給與但他旗俱行賞給若不賞給伊旗伊旗下人必怨弘昇矣著仍行賞給或補給拴養馬



匹之人或給兵丁置備器械或器械已經置訖存貯以充公用之處著弘昇酌量辦理今雖賞給銀兩令其置備器械但於今年十月內點看一時爭相置買其價必然倍增未必今年即能備具令於今年十月點看一半明年十月再行全看如此則價值不至騰貴而兵丁等亦易於置辦矣但今年點看一半其餘一半明年點看其中有那移頂替者亦未可定著於明年點看時即行閱看兵丁或朕躬親閱或派王大臣閱看之處著八旗

都統會同總理事務王大臣等議奏再從前曾經禁止質當盔甲器械等物今再嚴加禁約交與八旗五城於京城內外當舖中所有盔甲器械著以來年正月為限此時稍寬其期俾得辦理完給正月以後朕派侍衛官員乘其不意將各當舖稽察倘經察出務將五城官員及開當舖人質當之人併該管人稽察人等從重治罪不可不預申禁約或有不肖之徒借此訛詐開當舖人亦未可定併應嚴行禁止

二十七日禮部奏青海大捷請受朝賀奉

上諭此番平定青海皆係我

皇考所簡用之將軍育養之官兵感恩効力是以克奏膚功  
此特賴

皇考所貽謨烈豈可為朕有乎但朕躬者即  
皇考之繼體朕亦祇得勉從所請俟告祭諸  
陵後擇日具奏

世宗憲皇帝上諭內閣卷十七

欽定四庫全書

世宗憲皇帝上諭內閣卷十八

雍正二年四月

上諭十九道

初三日怡親王等議奏副河道總督嵇曾筠請設標  
下河兵應不准行奉

上諭嵇曾筠已授副總河職銜伊奏請添設河兵一事爾  
等議覆無庸添設但總河駐劄南河兼管運河於河南

黃河相去甚遠猝有緊要工程實難相顧故將河南黃河另著副總河管理若無標下官兵難共驅使總河標下十河營兵數甚多或令齊蘇勒酌撥分給務期永遠可行爾等詳議具奏

又三法司議奏侵隱莊親王財產之府佐領下人焦弘勲擬絞監候秋後處決奉

上諭楊纘緒田家穀俱有言職風聞事件向許奏聞焦弘勲一案三法司堂官俱已畫題伊等並不畫題若議罪

之處與伊等意見不合即應另行啓奏伊等既不畫題又不另奏非欲沽名即係徇私爾等傳諭楊繼緒田家穀令其明白回奏此案既有御史二人不肯畫題該部不行聲明亦屬不合嗣後凡會稿事件如有不畫題者爾部即行聲明具奏

初五日奉

上諭據蘇尼特阿霸垓阿霸哈納爾蒙古人等俱稱連年災傷今又遭大雪牲餼俱已倒斃等語若差官查奏始

行加恩則現今乏食之人恐至饑餒著叅領多索里侍衛納蘭馳驛前往查核發戶部帑銀二萬兩前去會同阿霸琰公德木楚克逐一查明計算實在無畜牧不能度日者將此銀兩著四旗酌量散給均使沾恩

初七日奉

上諭自戊子年來朕之無知兄弟數人種種妄行以致

皇考暮年憤懣之處難以枚舉未嘗貽

皇考一日之安也是以肌體消瘦血氣衰耗伊等非惟不自

引咎毫無愛戀之心且固結黨援希圖僥倖由來人矣  
伊等如此妄行朕時時殫竭心力寬慰

皇考保全伊等不但伊等知之諒亦衆所共知也朕即位後  
不念舊惡惟篤兄弟之誼恩予包容指示教誨冀其改  
過以期終始保全伊等不知感恩罔悛舊惡益復妄行  
在昔

皇考時朕尚以兄弟之故如彼周旋豈今紹承大寶而有凌  
逼兄弟指瑕求疵之理乎允禩素行陰險狡詐



皇考深知曾於朕兄弟前屢降

諭旨不可悉數亦難悉記今姑舉其一與衆知之康熙五十

三年

皇考自熱河回鑾駐蹕要亭允禩遣人以將斃二鷹上進

皇考

皇考甚怒硃批

諭旨以示朕及諸皇子捧閱之下俱無奏言朕獨繕摺具奏

所批

諭旨誠親王收貯現今繳上諒此

嚴旨允禩未必得知即允禩亦斷不以告也

皇考所遺諭旨諸王大臣一經捧閱即知之矣朕豈有意凌虐苛責之哉自朕即位不計允禩從前諸惡惟念骨肉兄弟優封親王任以總理事務理應痛改前非感朕包容委任之意輸其誠悃以輔朕躬乃不以事君事兄為重猶以同輩諸弟允禩允禴為伊出力之故懷挾私心由此觀之其大志至今未已也諸凡事務不實心辦理

有意墮廢使朕受不美之名且每遇奏事並不身到亦不檢點苟且草率付之他人故激朕怒以治伊罪朕斷不使伊志得遂也朕之此弟較諸弟頗有辦事之材朕甚愛惜非允禩允禩等可比朕今惟加以教誨令其回心改過至誠佐理政治堪為得力之人斯不但成朕友于之誼亦以全

皇考慈愛之衷伊果抒忱於朕即無異盡心於

太祖

太宗

世祖

聖祖矣如此則諸王大臣誰復外視伊者不但伊自受恩傳之子孫亦永永勿替若仍不知悛改肆行悖亂干犯法紀朕雖欲包容寬宥而國憲具在亦無可如何當與諸大臣共正其罪昔

皇考年十五執巴圖魯公鰲拜往事可鑒朕若果欲將允禩治罪當令其不及措手豈有於衆前三復教誨之理朕實

望其回心耳爾諸王大臣亦宜時加勸化務令改悔併皆  
留心詳視允禩果能回心改過明於君臣大義感激朕  
恩表裏如一爾等即據實陳奏若怙過不悛亦斷不可  
隱諱允禩

聖祖仁皇帝之子朕之弟也安可目視其日即於凶惡乎伊  
之善惡若不據實奏明稍有隱匿非惟負朕更有何顏  
瞻拜

景陵朕向日並無希望大位之心倘如伊等營謀朕亦不讓

伊等伊所糾合之人朕豈不能糾合伊能市私恩小義之名朕豈不能邀取朕素無此志他人容或不知深知朕者無過允禩也

皇考以大位付朕朕念

皇考四十五年顧復深恩勉承大統仰荷

皇考詒謀之重大夙夜祇懼不遑寢食天下幾務無分巨細務期綜理詳明朕非以此博取名特以欽承

列祖開創弘基仰體

皇考付託至意為

社稷之重勤勞罔懈耳爾諸臣內但有一人或明奏或密奏

謂允禩賢於朕躬有足取重之處能有益於

社稷國家朕即讓以此位不少遲疑為君非易事若只圖一

身逸樂亦復何難必欲繼美

皇考則更無難於為君者矣朕既受

皇考所付重任則朕之一身上關

宗廟

社稷不得不為

皇考之聖神猶防允禩等之奸惡不能一日寧處朕身視

皇考何如耶且於

皇考則為父子於朕則為兄弟父子之於兄弟相去甚遠伊

等在

皇考時毫不遜順恣意妄行匪朝伊夕至今猶然不止所當

深慮朕可不念

祖宗肇造鴻圖永貽子孫之安乎大臣等叅奏允禩摺子曾



與誠親王恒親王淳親王看過王等云此所奏雖是而猶未盡

皇考大內所降諭旨伊等不知之處甚多隨以

皇考從前所降諭旨繕摺具奏爾等將此摺傳示諸王大臣

又奉

上諭允禩既再三懇求奏稱若將各摺宣示諸王大臣臣更有何顏面行走等語

皇考所降硃筆諭旨與朕比時回奏摺子傳示衆人之處著

暫行停止俟其改悔其誠親王及大臣等所奏摺子著  
宗人府內閣一併鈐印封固內閣另行敬謹存貯

又

諭刑部朕惟明刑所以弼教君德在於好生從來帝王於  
用刑之際法雖一定而心本寬仁是以虞廷以欽恤垂  
訓周書以慎罰為辭誠以民命至重凡少涉疑之案寧  
過乎仁無過乎義也朕自臨御以來一切章奏無不留心  
細覽於刑讞一事尤加詳慎誠恐法司未能平允情罪

未能悉當朕心深用惻然故凡京城及各省題奏讞獄但少有可矜者無不法外施仁量加末減獨念朝審重囚其情實者刑科必三覆奏聞勾除者方行處決而外省情實重囚惟於秋審後法司具題即咨行該省無覆奏之例朕思中外一體豈在京諸囚宜加詳慎在外省者獨可不用詳慎乎人命攸關自當同仁一視自今年為始凡外省重囚經秋審具題情實應決者爾法司亦照朝審之例三覆奏聞以副朕欽恤慎罰之至意爾

部即遵諭行

初八日允祇奉使口外不肯前往於雍正元年十二月進張家口捏稱有

旨令其進口居住兵部奏

聞奉

旨交廉親王允禩議奏允禩以作速行文令允祇仍舊前往并將不行諫阻之長史額爾金交部議處等語具奏奉

上諭覽所奏殊為多事允祇於中途私回不肯前往原奉差遣之處今又何必令其出口若仍令出口似朕有意將伊逐往嚴寒之地矣朕若遣往自必令伊前赴喀爾喀地方伊既已進口亦聽其自便至額爾金原非允祇意之所重現今指使允祇之人尚未處分額爾金何必治罪著允禩再議具奏 允禩奏請將允祇革去多羅郡王撤其所屬佐領沒入家產解回交宗人府永遠禁錮奉

上諭所奏著交諸王貝勒貝子公及議政大臣詳議具奏  
允祇卑鄙性成行止妄亂文學武藝蒙

皇考訓諭數十年終於一無所成平生無一事可以上慰

皇考聖心貽

皇考一日之悅豫抑且賦性陰險朕兄弟中最为微末無恥  
之人既不自知其庸懦無能又不肯安分守己恣意僣  
強覽廉親王所奏允祇惡蹟似無虛語數十年來朕諸  
兄弟

皇考何嘗藏諸深宮之中各人行誼昭然在人耳目不惟朕之兄弟知之舉國孰不知之耶諸王大臣等務期各秉公忠維持大義自出意見議奏倘稍有迎合之念及苟且照廉親王所奏議覆之處豈特隳壞爾等臣節更有何顏瞻拜

景陵且庶親王所奏或出至誠或蓄他志在朕猶自遲疑未信此事惟賴諸王大臣公忠辦理著速議具奏  
比時諸王大臣奏允祇奉使不肯前往詐傳

旨意私自進口不法已極應革去郡王撤回佐領交宗人府永遠禁錮臣等所議實秉至公即有

諭旨寬免允祿臣等必不奉

詔奉

上諭此事交爾等公議欲識諸王大臣之意耳如欲治允祿之罪則竟治其罪矣朕非不能執法之主豈有委爾等治罪之禮覽諸王大臣議奏朕非鄙薄爾等所見實有不到允祿朕弟也國法具在犯法即應治罪朕豈避



加罪於弟之名而委之於人乎允禔之事交與允禩者特以觀其如何處置並無他意向來允禔允禔允禔等俱奉允禩為師伊所指示即便遵行故朕望允禩教誨伊等使之改過乃不但不行教誨反激成伊等妄為朕所差遣之處竟不前往私回觀望居住口外數月又稱奉旨進口如此不法任意妄行皆由允禩指示其意惟欲朕將伊等治罪以受不美之名允禩見小不明大體豈知此等無理無義乖戾犯法之弟治之以罪適足以

昭朕無私之善政何礙之有經史謂社稷為重君次之若令朕躬有無益於

社稷諸王大臣以

社稷為重倣伊尹放太甲之所為朕亦視為忠愛之臣若諸王大臣官員軍民人等戴朕如父母畏法如雷霆則朕躬上闕

社稷苟無益於朕躬即無益於

社稷矣朕今施以恩澤而不知感喻以法令而不知懼朕當

以

社稷為重雖係兄弟亦難顧惜朕自當明罰勅法候降諭旨  
此事諸王大臣理應將允祇素行與今所作之罪明白  
指陳或照允禩所議治罪或加等減等治罪之處請旨  
定奪朕自降諭旨豈有以朕弟而聽諸王大臣擅自定  
議之理乎此權亦不可付之諸王大臣也

初九日奉

上諭禁止私創人參者原為窮民入山傷生者甚多所以

立法甚嚴舊定律例不論已得未得俱解送刑部嗣以未得參之人未免往返拖累為可憫惻故於盛京刑部監禁每年差官前往審理朕思伊等俱係圖利窮民春夏時被獲監至九月十月方得審結延挨月日身受寒暑風雪飲食不能隨時多致疾病死亡甚屬可憫寧古塔有將軍辦事御史盛京有將軍刑部併副都御史永福嗣後將各地方所獲者即行審理作速完結年底令審理各官將一年內審結之案彙齊具本啓奏自今年

為始將審理偷創人參事件之部院衙門堂官傳其差遣如此則案內之人無久禁凍餒之苦累矣

又

諭江南總督查弼漕運總督張大有署理江蘇巡撫何天培朕惟漕運所經河道固以通國廩之輓輸亦以便商民之利涉旗丁與商民自應一視同仁無容偏護而偏累也去年因秋冬雨少河流淤淺而旗丁人等不顧漕運維艱任意攬載客貨致船重難行聞今春丹陽常

州等處地方及沿途遇淺槩拏商船起剝且借名需索貪暴公行得賄者雖空船亦行釋放不遂其欲者勒令當差有將貨物行李拋棄河干紛紛露積或為風雨所損傷或為盜賊所窺伺該管漕運文武官弁漫無約束毫不經心小民營販資生何以堪此擾害爾等係地方大吏皆當實心體恤稽察周詳奉諭之後或再有起剝之事當各嚴飭所屬官弁申明約束不得仍蹈前轍並出示遍諭軍民人等使知朕一體軫恤之至意至張大

有身任總漕糧艘往來乃其專責尤宜整肅綱紀釐奸去弊嚴明馭下毋使玩法犯科乃往往固執已見袒護下屬任其沿河盜賣漕糧兼倚勢藐法貽累地方甚屬不合今除已往不深究外嗣後若仍不加意約束屬員有心縱容及失於覺察再經朕訪聞定行嚴加議處其欽承毋忽

十九日九卿等遵

旨詢問御史田嘉穀楊纘緒會議焦弘勲一案不肯畫題

又不另議緣由具奏又田嘉穀楊纘緒各明白回奏  
奉

上諭焦弘勲一案田嘉穀楊纘緒如何不畫題若有不慊  
意處即當兩議或將不畫題緣由繕摺奏聞不然即應  
同三法司畫題具奏言官尚許風聞言事乃在與議之  
例既不兩議又不奏明緣由又不畫題耽延命案是屬  
何心因朕問及耽延之故始知由伊等不畫題所致伊等  
既故為隱瞞設朕不問及不知伊等之不曾畫題竟



照法司所議完結伊等必退有後言以為人命案件三  
法司大臣官員不能詳審定案是以我等不曾畫題借  
此邀名干譽無所不至古人慎重民命每戮一人必謀  
之左右謀之大夫更謀之國人今縱不能謀之國人如  
何與議官員內尚爾議論不能全同況朕自即位以來  
屢經面諭大臣官員務宜矢公矢慎同寅協恭不可少  
有偏私拘執意見如有於心不合之處不妨奏聞朕自  
有定奪朕深望爾等之直言陳奏爾等自應仰體朕心

直陳所見今觀田嘉穀楊纘緒之所為是專務虛聲自  
樹黨援非愚昧無知即其心叵測此等人如何用得事  
雖微小亦不可不防微杜漸此風斷不可長田嘉穀楊  
纘緒著革職回籍今尚在三年之內故但令革職回籍  
如三年後大小臣工尚不能滿漢一體同心協力猶有  
各執已見邀譽盜名者朕必治以重罪

十五日奉

上諭朕於朝會大典行禮有年見我滿洲禮儀甚屬廢弛

大非尊君敬上之道我

皇考神聖寬仁如此等處雖經目覩一切包容若為不知故  
稽查之大臣官員仰見

聖度寬宏遂皆視為尋常並不約束糾叅漸致疎忽不謹朕  
今即位既已深知若不整理嚴禁將來流弊無所底止  
我

皇考在位六十餘年天下軍民每一言及尚無不額手感戴  
而居官者反不知敬禮可以為人乎且

皇考在位六十餘年深仁厚澤遍及四海九州而朝堂之上  
尚有不知竭誠盡敬干犯法紀者朕今何所恃而望衆  
人之無不致敬盡禮耶此等愚昧之人非可以寬仁感  
化祇得以法令治之國家大典攸關君臣大義所係朕  
亦無如之何朕自御極以來屢有諭旨近又申飭嚴禁  
乃奉旨未幾而李建勲羅植於行大典禮之日即顯違  
朕旨著將二人俱革職拏送刑部監候秋後正法並飭  
諭該稽察之御史侍衛等嗣後加謹嚴查遇有失儀者

即行糾叅若不糾叅經朕另派之人查出必重治伊等之罪

十七日

諭太常寺贊禮郎讀祝官內有人材可用辦事勤慎者爾等即行題奏令其部內辦事仍兼管行走亦無貽誤祭祀之事再讚禮郎讀祝官除祭祀外並無別事有常在園館醉飲至祭祀之處猶有酒氣者此等人雖能讀祝爾等亦必題叅革退

丁八日署京口將軍李杓奏請領催劉起鵬等補授  
驍騎校奉

上諭各省此類記名人甚多缺出之時皆將記名人題補  
但未記名之人若無補用之途伊等何以効力行走著  
該部行文各省將軍等將未記名人內有人材可用弓  
馬嫻熟盡心効力者揀選具奏

十九日奉

上諭前有條奏婦女入廟進香成羣聚會混雜行走妄費

無益及入於別教妖言惑衆理宜禁止者曾降旨准行但並未禁止民人於名山寺廟中禮拜也今聞凡係寺廟槩行禁止不許民人叩拜又往髻髻山進香人等於金盞河地方掛號取稅皆與朕旨不合其禁止太過之處在京著禮部查明具奏金盞河地方交與直隸巡撫令其查明具奏

二十日總理事務王大臣等議奏青海大捷獻俘

太廟是日

皇上御午門受俘奉

上諭此次平定青海實乃

皇考留貽之功故捷音到日恭告

景陵今造逆首惡吹拉克諾木齊等三人檻送到京朕令議

獻俘

太廟之禮以慰

列祖在

天之靈諸王大臣等乃議及受俘歸功於朕非朕本心可否



祇行獻俘不行受俘之禮諸王大臣等再察典禮具奏  
二十四日都察院奏請將散給流民餘剩銀兩存貯  
五城以備賑饑粥飯柴薪等用奉

上諭此銀存貯五城備用甚好遇有掩骸之事亦於此項  
銀內動用但須核實毋得冒濫

二十六日奉

上諭允祇不肯前往奉差地方並不請旨私自回來詐稱  
抱病任意出入邊界朕已寬容數月伊毫無惶懼之意

公然違旨居住彼處近召入王大臣等嚴降諭旨允祇未嘗不知亦竟不差一人前來謝罪奏請殊失臣節其以朕為不能治伊之罪乎允祇素係凶暴無知之人著革去王爵調回京師永遠拘禁將允祇之子與伊家產佐領下人員如何措置並拘禁處所著各該管處另行請旨



世宗憲皇帝上諭內閣卷十八